



Communicaziun da medias digl cumegn da Surses (nr. 08-2023)

Surses: Rendachint 2022 fitg positiv

La radunanza communalà è approvo igl rendachint 2022 tgi sera cun en surple d'antradas da stgers 4 milliuns francs. Pinavant è igl suveran concedia en credit per sanar igl provedimaint d'ava a Savognin ed è approvo la nova lescha d'alps, pastgiras e prada e la revisiun parziala dalla lescha da votaziuns e d'elecziuns.

Sainza cuntervusch è la radunanza communalà approvo igl rendachint 2022. Siva tg'igl suveran è decidia da metter 2 milliuns francs ainten la prefinanziaziun per la construcziun dalla tgesa da scola primara a Savognin sera igl rendachint anc cun en surple d'antradas da radond 3.9 milliuns francs. Chegl tar antradas da radond 40 miu. francs. Budgeto ins veva en surple d'antradas da radond 2.28 milliuns francs. Igl resultat positiv vign declaro cun l'indemnisaziun dalla scadenza da concessiun concernent l'ovra electrica Casti vest e cun antradas supplementaras tar las taglias spezialas.

Las investiziuns bruttas montan a radond 9.89 milliuns francs (investiziuns nettas radond 6.88 milliuns francs).

Approvaziun dalla lescha d'alps, pastgiras e prada digl cumegn da Surses

Cun dus adattaziuns proponeidas dalla radunanza communalà è igl suveran approvo cun gronda maioritad la nova lescha d'alps, pastgiras e prada digl cumegn da Surses. Chella lescha vo an vigour cun la data digl conclus e ramplazza las leschas digls anteriours cumegns da Bivio, Cunter, Marmorera, Mulegns, Riom-Parsonz, Salouf, Savognin, Sur e Tinizong-Rona. Siva la fusiun igl 2016 è igl cumegn dad unifitgier la legislaziun communalà.

Introducziun dalla «elecziun taciturna»

Cun gronda maioritad è la radunanza communalà approvo la revisiun parziala dalla lescha da votaziuns e d'elecziuns digl cumegn da Surses. Ultra da diversas precisaziuns ed adattaziuns formalas dalla lescha è nia decidia d'introduceir la «elecziun taciturna» per l'elecziun dallas instanzas communalas tgi on da neir fatgas tenor la constituiun communalà all'urna. Chegl dantant angal per sagonds scrutinis e tar elecziuns complementaras, schinavant tgi dat betg duple candidats resp. candidatas tgi posts libers. L'elecziun taciturna na vign dantant betg applitgeida per l'elecziun digl mastral e digls commembers da supranza.

Cun l'elecziun taciturna ins vot spargner costs e labour administrativa ed igl madem mument er cumbatter la lassezza da votar cun evitar scrutinis nunnecessris per elecziuns incontestadas.

Credit per sanar igl provedimaint d'ava a Savognin

La radunanza communalà è er approvo en credit da CHF 360'000.00 per sanar igl provedimaint d'ava Pro digl Sot a Savognin, tgi furma ena part impurtanta digl provedimaint d'ava a Savognin. Cun las lavours planisadas vignan adampleidas las preteisas da qualitat dumandadas digl Uffezi cantunal per la siertad da victualias e per la sanadad d'animals.

Ulteriours sclarimaints dat igl mastral Leo Thomann (telefonign 079 405 96 73).

Tinizong, igls 27 da zarcladour 2023